

Namzyieng Hocouh:

“Meuzfeiz” Bouxcuengh Yied Foux Yied Hoengh

贺州南乡：壮族“火猫”越舞越红火

□ Loeg Fatdiuz Ciengj Yen



▲ Doenghduz dajciengx ndaej fungsou.



▲ Gaemhdawz duznou bauj haeux fungsou.



▲ Duzmeuz gyaep dwk duznou mbouj miz dieg ndoj.



▲ Foux meuz raez angqyangz diuq hwnjdaej.



▲ Goenglaux bang banlan “vunzmeuz” baek yiengsaenz.

Hocouh Si Namzyieng Cin dwg aen yieng Bouxcuengh comzyouq ndeu, beixnuengx Bouxcuengh giz-neix daj ciuhgeq gvaqdaej couh bibi comz guh cungj guh' angq hozdung “foux meuzfeiz” ndeu dwg gizwnq mbouj raen miz gvaq. Vunz Namzyieng dawz “foux meuzfeiz” yawj dwg vunzlai daengx yieng hangh hozdung ciq hoenghhwd ndeu, ndigah caenh cij youq ndwencieng cij banh, daengz seizneix, “meuzfeiz” Bouxcuengh Namzyieng yied foux yied hoenghvuengh. Bi 2010, “foux meuzfeiz Bouxcuengh” ndaej lied haeuj swcigih buek daihsam feihvuzciz vwnzva yizcanj mingzloeg.

“Foux meuzfeiz” dwg youq gwnz goekdaej aen yizsi caeqcuengq ndawbiengz Bouxcuengh hwnghat hwnjdaej, dwg diuqfoux ndawbiengz Bouxcuengh yungzhab le vwnzva Cunghyenz caeuq vwnzva vunznduj Lingnamz youq giz ndeu, funggek yisuz daegbied. Ciuq vunzlaux dang-dieg lwnh naeuz, goengcoj Bouxcuengh Namzyieng ngamq daej daengz Namzyieng seiz, dauqcawq dwg ndoi fwz bya ndoq, nyaenyak gig lai, gyoengqde youq gizhaenx haifwz dajndaem, hoeng seizhaenx duznou gig lai cungj daej caeg gwn gij haeux gyoengqde, vih gyaep duznou deuz, vunzlai Bouxcuengh Namzyieng couh bae cawx meuz ma ciengx, duzmeuz dawz duznou gyaep deu lo, haeux ndaej fungsou, vunzlai ndaej gwn ndei youq onj, baenzneix couh gingqcungh saenzmeuz, doeklaeng cix banh gij hozdung aeu fiengz-nyangj cug baenz “meuz raez” daej gyaep “duznou”, mbaenjgouz vunzlai ndang cangq haeux ndaej fungsou. Dangguh haidaeuz aen hozdung “foux meuzfeiz”, gyoengq vunzlai Boux-

cuengh Namzyieng itbuen youq liggaeuq ndwencieng ngoenz cibngux doengxngoenz youq coengceiz goengcoj banh caeqcuengq yizsi, riengz-laeng diuq foux meuzfeiz, aeu neix geiqniemh goengcoj, muengh saenzmeuz bang vunzlai miedraeg duznou, hen ndei gij doxgaiq fungsou.

“Foux meuzfeiz” Bouxcuengh faen song cungj, cungj ndeu foux meuz raez, cungj ndeu foux vunzmeuz. Foux meuzfeiz itbuen dwg daj ndwencieng coit daengz cibngux gaeujngoenz banh, hoeng gvaq cieng cibngux couh mbouj ndaej foux lo. Foux meuz raez caeuq “foux lungzfeiz” Bouxgun、Yauzcuz lumj di, ndigah “foux meuzfeiz” caemh heuhguh “foux lungz nding”. Binaengz meuz raez cug ndei le couh gungngaueu dwk baek youq ndaw naz, doengxhaemh le, daengx mbanj lauxnyaq saimbwk doxcomz youq henz dong feiz, diemj dawz yiengsaenz, baek hwnj gwnz “ndangmeuz” bae, yienzhaeuh boq loxlez roq gyonglaz, gij vunz foux meuz haenx couh yaengx “gyaeujmeuz” caeuq “ndangmeuz” hwnjroengz dwk foux hwnjdaej; seizneix baihnaj miz geij boux lwgnyez song fwngz dawz gaem yieng diemj dawz hoenxngauq ndeu, ngeng swix ngauz gvaz dwk yatdiuq, cang guh “duznou” buetbongh; ndaw gyanglaep, baihnaj miz “duznou” gaem yieng nyex “gyaeujmeuz”, baihlaeng miz “meuzfeiz” coemj swix coemj gvaz gyaep “duznou”, dajbeij aen eiqsei “duzmeuz gaeb duznou”, yienj ciudaeuz ndaw bi moq fungsou, ciengzmienh nauhyied hoenghhwd. Vunzlai sien hopngomx aen mbanj foux hop ndeu, ciepdwk caiq bae daengz gwnz haw biujyienj. Foux vunzmeuz couh dwg bouxvunz cang



▲ Duzmeuz yat hwnj coemj coh duznou.

guh “meuz” diuq foux, “vunzmeuz” gyaep daep “mauhmeuz”, song gen、song ga cungj hot cug cagfiengz, doengxhaemh le comz youq rog mbanj, diemj dawz yiengsaenz, baenz diuz baenz diuz baek hwnj gwnz mauhfiengz caeuq cagfiengz bae, bouxyienj baiz baenz coijdaengj, youq sing gyonglaz、loxlez buenxha lajde, doq byaij doq foux, baihnaj miz “duznou” buetbongh, baihlaeng miz duz youh duz “meuzfeiz” gaeuz hwet yat coemj. Bae daengz gizdieg haemq gvagq haenx, lij miz biujyienj byaijdoengh “laenz cag” haenx, “meuzfeiz” diuq foux seiz, baihhenz lij miz gij vaiz、max、mou、yiengz、gaeq、bit daengj doenghduz aeu fiengznyangj cug baenz haenx, lajdaej an miz loekci, gwnz ndang caemh baek gij yiengsaenz diemj dawz haenx, riengz aendoih “vunzmeuz” diuq foux, yienj ciudaeuz dajciengx baenz hoengh. Sien youq rog mbanj diuq foux dangq ndeu le, caiq doq foux doq byaij bae daengz gwnz haw biujyienj. Haemh haenx biujyienj sat le, dawz meuzfeiz baek hwnj gwnz dah coemhcag, naeuz dwg “cuengq lungz ma haij”.